



## Gaa-dakoosing Ozhibii'igan

Marten Falls First Nation Miikana (Miikana) wii-ozhichigaade, 184 km da-akoomon, izhiningo-biboon dayaabadad da-sakamon imaa gichi-miikanaang. Wegimaawaadiziwaad akawe da-nakwetamoog jibwaa-ozhichigaadeg miikana.

Akawe ji-aginjigaadeg mazina'igan waa-izhichigewaad ozhitoowaad miikana Final Environmental Assessment / Impact Statement mii owe mazina'igan ge-onjini-sidotaagwak Waa-izhichigewaad. Gaye da-naagwad dayaamagad ge-onji-waabanjigaadeg anokiimazina'igan, miiwan onowe mazina'iganan:

- Gichi-dibaajimo Mazina'igan;
- Ogimaakaan Omazina'igan;
- Da-nisidotaagwadoon ikidowinan; gaye
- Aanind gaye gegoo

Zhaaganaashii Ogimaag ezhi-gaagiigidowaad. Waa-izhichigewaad ozhitoowaad miikana Final Environmental Assessment / Impact Statement zhaaganaashii ogimaag odaabajitoonaawaa ezhi-bakaan izhi-giizhwewaad, ingoding wiin igo ginisidotawaanaanig.

### ES 1. Nindibaajimowininaan

Niinawind Marten Falls gaa-onjiiyaang Anishinaabeg ndayaamin imaa gaa-izhijiwingin Albany Ziibi gaye Ogoki Ziibi giwedining Ontario. Animikii-wiikwedong iwe gichiodena, Ontario ngojigo 430 daso-diba'akaan zhaawanong inake.

Aapiji weweni ndoondaadizimin omaa akiing, mewinzha omaa edanakiyaang egikendamaang ezhiyaag. Anishinaabe bimaadiziwin nin-dizhinikaadaamin owe – Anishinaabe bimaadiziwin – mii imaa wenji-gikendamaang aaniin ge-izhibimaadiziyaang omaa akiing gaye godak gaa-bimaadiziwaad omaa. Gii-anishinaabewiyaang, nimbimizha'aamin - mino-bimaadiziwin – weweni ji-ayaa'aang – Gizhe-manidoo aaniish nin-gii-miinigonaan owe, weweni ji-wiiji'ayaamangwaa godak awiyag.

Odaanaang gaa-gii-bi-ayaawaad weweni gii-izhi-bimaadiziwig gabe-biboon, gabe-niibin gii-andawenjigewaad, gii-giigooyikewaad gii-mawinzowaad. Gii-dagoshinowaad dash wemitigoozhiwaag, gii-aanjise bimaadiziwin. Niibiwa awensiwa o-gii-nisaawaa gaye inakonigewin daabishkoo Indian Act ningii-gibitinigoomin weweni ji-izhi-bimaadiziyaang. Gikino'amaadiiwigamigong gii-izhiwinaawag niniijaanisinaanig e-gii-maanzhidoodawindwaa, giyaabi noongom e-onji-gagwaadagendamowaad.

Bagwadakamig ayaamagan ndazhiikewininaan, ezanagak bimaadiziwin. Gaa-bimisemagak eta daa-aabadan ji-izhaang Marten Falls Animikii-wiikwedong gaye Nakina ji-onji-maajaang. Bibooni-miikana ozhichigaade endaso biboon, gaawiin dash bizhishig onizhishinzinon iwe ozaam bakaan gii-ani-izhiwebak. Zanagan dash ji-biijigaadeg miijim gaye godak gegoonan, gaye gaawiin aapiji zhooniyaakesiiwig awiyag. Gaawiin gaye minosesinon ji-mawadisindwaa gaa-inawemangwaa, gaawiin gaye aapiji miijim, nibi gaa-minikwaadeg gaye waasiganig-bimide gaye gaa-aabadakin gii-ozhichigaadeg gegoon, gaye mino-ayaawin.

Mii dash endawendamaang ji-ozhichigaadeg miikana ge-aabadak gabe-gikinoonowin, gaawiin eta gii-niibing, Ontario gichi-miikanaang ji-inamok iwe miikana. Giishpin iwe izhiseg, nin-ga-debinaamin gakina gegoon ge-aabajitoowaang. Nin-ga-gashkitoomin ji-dibenindizoyaang babenak ji-izhi-bimaadiziyaang. Iwe Dazhiikewin Miikana da-onji-minose niibiwa gegoon. Ninandawendaamin ji-gashkitoowaang ji-bami'idizowang daabishkoo gaa-izhi-mino-biamadiziwaad Anishinaabeg Dazhiikewining.

## **ES 2. Aaniin Wenji-andawendamaang Owe Miikanahy**

Iwe Dazhiikewin Miikana ayaamagak nin-ga-gashkitoomin gichi-miikana Ontario ji-izhaayaang. Bizaanigo da-mawadisidiwig Anishinaabeg nawach babenak ji-ayaag bimi-ayaawin. Nawach da-niisaginde miijim waasigani-bimide gaye godak gegoonan gaye nawach da-minose mino-ayaawin gikino'amaagoowin gaye mino-bimaadiziwin. Wiinge da-onizhishin bimaadiziwin giishpin debinamaang iwe miikana.

Owe miikana ge-aabadak gabe-gikinoonowin niibiwa da-inaabadan gaye da-onji-zhooniyaakewag Anishinaabeg dazhiikewining gaa-ayaawaad gaye godak. Iwe Dazhiikewin Miikana da-onjiimagan anokiiwin ozhichigaadeg iwe miikana gaye bamichigaadeg. Da-onji-minose Marten Falls Anishinaabeg ji-anokiiwaad aaniish naa da-anokiiwig gabe-gikinoonowin.

Aanawi Marten Falls maawach oda-aabajitoonaawaa ikwe Dazhiikewin Miikana, giyaabi dash akiikaan wii-aabajitoonaawaa ji-nanaandosiniwaad. Ozhichigaadeg iwe Dazhiikewin Miikana amii akiikaan ogimaawiwini ge-izhi-ozhitoowaad anokiiwinan, ginwesh ge-minoseg, gaye ji-mino-bimaadiziwaad awiyag waasa giowedinong.

Iwe Dazhiikewin Miikana, gaawiin gakina da-minosesinooon gaa-zanagendagwak giiyaabi dash da-minose niibiwa gegoon. Oshkiya'ii gaa-minoseg da-ayaamagan omaa dazhiikewining babenag ji-ayaag bimaadiziwin niigaan akiiwang.

### **ES 3. Ezhichigeyaang**

Niinawind Marten Falls Ishkoniganing gaa-onjiiyaang Ndagwiimin imaa Dazhiikewin Miikana. Nindanishinaabewimin imaa dazhiikewining ninandawendaamin dash jidagwiiyaang. Ogimaakaan gaye nishwaaso odininiima ndoodaapinigoomin endasoniizhobiboon daabishkoo gaa-izhising imaa Indian Act inaakonigewining. Ndagwiimin gaye nindoogimaakandaamin ishkonigan, niinawind dash ndizhisemin ji-izhichigeng ji-ozhigaadeg iwe Dazhiikewin Miikana, gaye ji-bizindawindwa Anishinaabeg omaa gaa-izhi-dibendaagoziwaad. Ji-minoseg iwe dazhiikewin izhichigaaniwang. Ogimaakaan gaye Ishkoniganing miiwag ogowe wegimaakandamowaad ishkwaj ikidowinan. Miiwag gaye ogowe, ge-ikidowaad aandi Ge-inamoog Miikana gaye waa-izhichigewaad ozhitoowaad miikana Final Environmental Assessment / Impact Statement

Marten Falls Dazhiikewin Miikana Izhichigewin (Izhchigewin gaa-dazhiikamowaad), gii-ozhichigaade ji-maajii-ozhichigaadeg ge-biminizha'igaadeg ji-gikenjigaadeg aaniin ge-inishkaagemagak iwe ozhichigaadeg miikana, gaye ji-gagwejimindwaa Anishinaabeg aaniish mii iwe endawendaagwak ji-izhiseg. Izhichigewin gaa-dazhiikamowaad, niizhiwag ishkoniganing gaa-onjiiwaad, bezhig gaa-niigaanishkang gaye gaa-nagajitood gegoon. Mii dash ogo ge-bizindawawaad oigmaakaan gaye odininiima gaye ishkoniganing gaa-wiidookaagewaad gaye gakina Anishinaabeg.

Izhichigewin gaa-dazhiikamowaad gii-inaawag ji-niigaanishkamowaad iwe, ji-maamiinomaawaad gaa-wiiji'iwewaad, ji-dazhiikamowaad zhooniyaakewin, jinaakwetamowaad, ji-agindamowaad azina'iganan. Izhichigewin gaa-dazhiikamowaad gaye inaawag ji-dibaajimowaad aaniin ezhiseg iwe gaa-ozhichigaadeg miikana, gaye jii-ikidowaad giishpin gegoon andawenjigaadeg ji-dazhinjigaadeg gaye godak gegoon. Gaa-nagajitoonid gegoon oda-wiidanokiimaawaa' ji-mikamowaad aaniin ge-izhi-wiindamaagewaad gikenjigewin imaa Marten Falls.

### **ES 4. Aaniin Gaa-izhi-odaapinamaan Ge-inamok Miikana**


2007 gii-izhiseg gii-gichi-naanaagadawenjigaade aaniindi ge-inamog iwe Dazhiikewin Miikana. 2019 dash gii-izhiseg owe gii-inenjigaade – Bezhig Inake 1 miinawaa Bezhig Inake 4. Minji-niizh Painter Lake Miikana maajii-inamood giowedinong dash izhaamaganooon 130 km jibwaa-izhaamagakin waabanong omaa gidazhiikewinininaang, ngojigo giowedinong imaa Albany Ziibi.

Bezhiig Inake 1 gaye Bezhiig Inake 4 bezhiigwan inake inamonoon, ningoding aazhideshkaawaan. Gii-nisinoon gaa-inamokin ge-gii-odaapinigaadegibaniin. Owe bezhiig aazhawishkaa imaa Ogoki Ziibiing, bezhiig miinawaa ji-aazhawishkaag Albany Ziibiing gaye gegapii odaapinigaadeg iwe waabanong inake Marten Falls.

2019 gii-izhiseg biinish 2024, gaa-gikendaasowaad o-gii-maawadoonaanaawaa gikenjigewin ji-nisidotamowaad aan ezhiseg aki, zhooniyaakewin gaye gaa-izhi-bimaadizinaaniwang. Gii-niibing 2023, gaa-gikendaasowaad gaye godak dinookaanag

gii-gagwejiimaawag ji-dazhindamowaad iwe gikenjigewin gaye Anishinaabe gikendaasowin, ji-dazhindamowaad wegonen iwe 1 Inake gaye 4 Inake, ji-odaapinamowaad maawach ge-onizhishing ji-inamog miikana. Gii-waabanjigaade dash owe inendamowin gaye Dazhiikewining gaa-ayaawaad awiyag enendamowaad, ji-gikendamowaad Anishinaabeg gaye Ogimaakaan gaye Odiniiniima', gaye dazhiikewinan, godag awiyag gaye ogimaag. Gii-dazhinjigaade dash owe, e-gii-waabanda'indwaa Ogimaakaan gaye Odiniiniima' ji-waabandamowaad. Ogimaakaan inaakonigewin e-ikidoomagak e-zaagichigaadeg (Ge-inamog Miikana) gii-ozhibii'igaade August 26, 2024 gii-inangizod. Waabandan Agindaason ES 4-1 ji-waabandaman iwe Ge-inamog Miikana.

# ES 4-1: Ge-inamog Miikana



## ES 5. Ge-inwaa zowaad Gaa-bimiwidoowaad

Jibwaa-gashkichigaadeg ji-ozhichigaadeg iwe Dazhiikewin Miikana, nitam da-andawenjigaadewan ji-bagidiniweng ji-izhichigeng gegoonan imaa izhichigewining, daabishkoo ji-ozhichigaadeg iwe Dazhiikewin Miikana gaye ji-achigaadegin ge-danakamigak owe ji-ozhichigaadeg. Iwe Dazhiikewin Miikana, ini niizhin ogimaawinan Gaanada Aki gaye akiikaan, da-ikidowag wegonen ge-andawendaagwak jibwaa-maajitaang.

Akawe da-ozhichigaade goji-ikidowin mazina'igan waa-izhichigewaad ozhitoowaad miikana Final Environmental Assessment / Impact Statement gakina awiya ji-waabandang ji-dibaajimowaad enendamowaad imaa mazina'iganiing. Waa-izhichigewaad ozhitoowaad miikana Final Environmental Assessment / Impact Statement zhaaganaashii ogimaa ogii-nakwetaang akawe mazina'igan Tailored Impact Statement Guidelines (Impact Assessment Agency of Canada, 2020a) gaye the provincial Terms of Reference. Akawe da-ozhichigaade goji-ikidowin mazina'igan waa-izhichigewaad ozhitoowaad miikana Final Environmental Assessment / Impact Statement, mii dash gaa-izhi-debwetang Mazina'igan.

Zhaaganaashii ogimaa miinawaa akawe oga-naanaagadawaabandaan gegoo ji-ayaagin wanichigewinan, akawe gaye oga-bizindawaawaa anishinaabeg ishkoniganing, mii omaa ji-gikendaagwak ayaamagak debwewin.

## ES 6. Waa-izhichigeyaang

Zanagan ji-ozhichigaadeg iwe Enishkaagemagak / Inishkaagewin Ikidowin. Iwe Ishkwaawaach Enishkaagemagak / Inishkaagewin Ikidowin dazhinjigaadeg Dazhiikewin Miikana igi niizhwewaan ogimaawinan da-ikidoomaganoon enendamowaad. Omaa ozhibii'igaade edakwaag ge-izhichigeng ji-ozhichigaadeg iwe inendamowin.

- **Anishinaabe Gikendaasowin:** 2019 gii-izhiseg iwe Izhichigewin Gaa-dazhiikamowaad o-gii-maajii-maawadoonaawaa Anishinaabe Gikendaasowin. Gii-maajii-dazhindamowaad iwe Enishkaagemagak Akiing / Inishkaagewin Ikidowin, gii-wiindamaagewag Anishinaabeg gekendamowaad iwe Anishinaabe Gikendaasowin. Gii-dagonigaade dash gaye imaa wemitigoozhii gikendaasowin. Gii-inenjigaade gaa-izhi-niizhing Anishinaabe gikendaasowin gaye wemitigoozhii gikendaasowin ji-onizhishing ji-biminizha'igaadeg, ji-gikenjigaadeg aaniin ge-izhiseg gaye aaniin ge-izhi-manaa-maanzhichigeng gaye ge-izhi-naagadawaabanjigaadeg gegoon.
- **Enishkaagowaad Ikwewag:** Gii-ganawaabanjigaade owe ji-gikenjigaadeg aaniin ezhisewaad awiyag owe onji. Daabishkoo ikwewag gaa-daawaad gegoon inendamogwenag anokiwininiwa' besho imaa gii-ayaanid maagizhaa gaye

Anishinaabe ininiwag gii-wiidanokiimaawaad wemitigoozhiwa. Ogichi-inendaanaawaa igi Marten Falls Anishinaabeg aaniish bakaan giinawind gidinenimigoomin. Gii-naanaagadawenjigaade owe bakaan inake aaniish gaawiin aapiji da-inishkaagemagazinoon apiich godak.

- **Gaa-zanagakin Izhichigewinan:** Maamaw 20 gii-dasinoon izhichigewinan gaa-ayaagin imaa Enishkaagemagak / Inishkaagewin Ikidowin daabishkoo iwe nibi ogidakamig gaa-ayaag gaye awensiwag gaye Anishinaabe bimaadiziwin. Mii owe nibi, aki gaye awiyag.
- **Gaa-gichi-inenjigaadegin:** Gii-maajii-dazhinjigaade wegonen gechi-inendamowaad Anishinaabeg, gakina awiyag, Gaanada Aki ogimaag gaye awenenag igo ge-inishkaagowaapan iwe Dazhiikewin Miikana; gichi-inenjigaadewan ini. O-gii-maawadoobii'aanaawaa ogimaakaang gaa-anokiwaad. Gii-dazhiikigaadeg dash owe, Anishinaabe Gikendaasowin gii-dagonigaade gaye egaganoonindwaa Anishinaabeg Marten Falls gaye godak ishkongiganan gaa-dibendaagoziwaad.
- **Gaa-naagwak:** Miinawaa dash ji-mikigaadeg aaniin ge-inishkaagowaad iwe Dazhiikewin Miitana igi gaa-gii-wiinindwaa ji-zaamishkaagowaad. Gaa-naagwak izhinikaade iwe. Aabajichiganan gemaa gegoon gaa-gichi-inenjigaadeg giishpin aanjiseg, maagizhaa gegoon daa-izhise nibi, aki gemaa awiyag.
- **Izhichigewin Ge-doodaming:** Nisidotamang aaniin ozhichigaadeg miikana ge-inishkaagemak imaa nibiing, akiing gaye awiyag gaa-daawaad omaa, gichi-inenjigaade ji-gikenjigaadeg iwe. Gaawiin gakina anokiwin izhichigewin da-ayaamagazinoon.
- **Gaa-ayaamagak imaa:** Da-wiinjigaade aaniindi gaa-dazhinjigaadeg ji-gikenjigaadeg aan ge-izhiseg.
- **Noongom eta Gaa-ayaamagak imaa:** Mii ge-onji-gikenjigaadeg aaniin ako ginwesh ge-inishkaagemagak. Iwe Dazhiikewin Miikana ozhichigaadeg, aabajichigaadeg gaye ganawenjigaadeg, mii gaa-idamowaad. Ngojigo 3 gemaa 10 daso-biboon da-ozhichigaade iwe miikana, ji-aabajichigaadeg gaye ji-ganawenjigaadeg wiin bizhishig.
- **Noongom gaa-izhinaagwak:** Aki, nibi gaye awiyag gii-maawadoonigaade gikenjigewin aan ezhisemagak imaa ge-ayaamagak iwe Dazhiikewin Miikana.
- **Ge-inishkaagemagak:** Noongom gaa-izhinaagwak, gaye ozhichigaadeg miikana, aabajichigaadeg miikana gaye ganawenjigaadeg, da-gikenjigaade aaniin ge-inishkaagemagak iwe ozhichigaadeg Dazhiikewin Miikana imaa aki, nibi gaye awiyag gaa-daawaad imaa. Gaa-ishkwaa-waabanjigaadeg ge-izhiseg, gaye aaniin

ge-inishkaagemagak iwe, gaye ji-gikenjigaadeg wegonen ge-izhichigesigwaa ji-maanzhiseg gegoon. Iwe Ge-inishkaagemagak gaa-ijigaadeg ge-izhiseg ishkwaadoodamowaad ji-maanzhisesinog gegoon. Da-waabanjigaade dash iwe Ge-inishkaagemagak wegonen wenizhishing gaye wegonen gaa-onizhishinzinog iwe Dazhiikewin Miikana gaa-izhichigemagak. Igi dash gikendaasowin gaa-dazhiikamowaad oda-ozhibii'aanaawaa aaniin ge-izhisemagak.

- **Ge-meshkojinaagwak Ozhichigaadeg Miikana: *Impact Assessment Act Izhinikaade*** (Government of Canada Zhaaganaashii Ogimaa, 2019b) Akawe zhaaganaashii ogimaa oga-naanaagajitooon Environmental Assessmentminik gegoo ge-meshkojinaagwak inamoog miikana. Gii-ozhichigaade niibidebii'igan gaa-dazhindeg inoongom izhichigewinan gaye gaa-andawendamowad ji-izhichigewaad. Gii-aanjibii'igaade dash iwe mazina'igan ji-dibaajimowaad Anishinaabeg gaye godak awiyag oodenaang gaye igi gaa-bimiwijigewaad. Gii-ganawaabanjigaade dash iwe niibidebii'igan ji-waabandamowaad aaniin ge-inishkaagemagak imaa akiing, nibiing gaye awiyag gaa-daawaad imaa iwe Dazhiikewin Miikana onji. Maamawiizhiseg mazina'igan gii-ozhise.

## ES 7. Ozhichigaadeg Gi-miikanaaminaan

Iwe Dazhiikewin Miikana da-ozhichigaade gabe-gikinoonowin ji-aabadak Painter Lake Road biinish imaa Marten Falls. Ge-dibendamowaad iwe, ge-naagajitooowaad, ji-wawezhitoowaad, gaye giishpin maanzhichigemagak mii ono akiikaan gaa-dazhindang. Iwe Dazhiikewin Miikana iwe miikana gaa-dazhinjigaadeg, gaye miikanaansan gaa-babakemokin, gaa-izhi-gibichiing, ge-wiikobijigaadeg, aazhoganan, zhiibaa-miikanaang ge-izhijiwang nibi, waanikaanan gaye asinii-waanikaanan.

O'owe da-akooman 184 km mitaawango miikana endaso-biboon igo ayaabadad;

- Dayaazhoganokaadewan / gaye ge-izhi-zhiibaajiwang i nibi;
- 100 m da-inagwagwademon, 60 m da-dawaanikaadewan eya'iidawikana;
- Da-niizhomonon miikanan, 12 gemaa gaye 13 m mii owe ge-inigokwademogin;
- 80 kmp da-ayaawan agwaakwa'iganan ge-apiichibizong;
- Da-ganawenjigaadewan weweni gizhaabajiwangin;
- Da-ayaawan, ge-izhi-biinjiijiwang nibi gaye bakaan nake ji-ani-izhijiwang;
- Da-ayaawan gaye bebakemogin noomag eta go;
- Gibichiiminan gaye da-ayaawan, gaye;

- Da-ganawenjigaade miikana weweni ji-minomag, da-ayaawan gaye ge-izhi-gibichiing.

Final Environmental Assessment / Impact Assessment Mazina'igan mii owe gii-kiizhichigaadeg mazina'igan ge-izhinaagwak miikana, o'owe wiin igo apii maagizhaa naagaj bakaan izhinaagwad gaye wa'awe wegimaakandamowaad eta oga-waabandaanaawaa.

## ES 8. Bimaadiziying Imaa Gidakiiminaang

Gichi-inendaagwan iwe Nitam Enishkaagemagak / Inishkaagewin Ikidowin jii-nisidotamang aaniin ezhisemagak gakina gegoon daabishkoo aki, zhooniyaakewin gaye gaa-izhitwaaying, gaa-izhiseg igo gegoon. Gaa-naanaagadwaabanjigaadeg Enishkaag aki, biindig onzaabandaman gaye agwajiing, gii-giizhichigaadewan ono ji-gikenjigaadeg ezhisemagak gakinagegoon noongom 1 Inake gaye 4 Inake. Gii-odaapinigaade Gaa-andawenjigaadeg Ji-inamok, ini dash gikenjigaadewan nibi, aki gaye awiyag gaa-daawaad imaa. Owe dash gaa-onji-izhichigewaad:

- **Nibi:** Bimaadiziwin onjiimagan nibi, giminigoomin aki gaye gakina awensiwag gaa-ayaawaad omaa.
- **Aki:** Marten Falls Anishinaabeg ogichi-inendaanaawaa aki. Mii imaa akiing wendinamang gakina gegoon, aweneniwiying, izhitwawin gaye gaa-izhi-bimaadiziying. Akiing izhi-bimaadiziwig gakina bemaadiziwaad, mii imaa ezhi-waakaaseg gegoon. Gaa-gii-izhibaadiziying daabishkoo gii-andomoozweying imaa akiing wenjiimagak iwe. Aanawi ginandawendaamin oshkiya'iin gaa-ayaagin noongom daabishkoo zhooniyaakewin, zhaagooch dash Marten Falls Anishinaabeg ogichi-inendaanaawaa iwe bimaadiziwin. Marten Falls Anishinaabeg ogichi-inendaanaawaa gaa-izhiseg aki. Aapiji wii-gichi-winaanaawaa gete-bimaadiziwin aaniish mii imaa onizhishing aki ge-ondinaman bimaadiziwin ani-akiiwang.
- **Mii:** Awiyag Gaa-daawaad omaa: Nitaa-wanii'igewag gaye bagidawaawag gaye andawenjigewag Anishinaabeg ji-ashandizowaad gaye mii aaniish gaa-bi-inaadiziwaad odaanaang. Gaa-gii-izhi-bimaadiziwaad Marten Falls Anishinaabeg noongom gaawiin aapiji iwe izhichigesiiwig ozaam bakaan e-inendaagwa bimaadiziwin. Giiyaabi dash ominwendaanaawaa gii-andawenjigewaad onandawendaanaawaa dash gaawiin ji-wiinichigaadesinog odakiimiwaa.

Wiinge niibiwa gikenjigewin gii-maawadoonigaade gii-nanaando-gikenjigeng, gii-ozhibii'igaadewan dash ji-gikendamong aaniin gaa-izhi-waabandamowaad igi gaa-gikendaasowaad. Gaawiin omaa mazina'iganing da-ozhibii'igaadesinon aaniish

bebikish da-ozhibii'igaade iwe gikendaasowin. Ono mazina'iganan maamawibii'igaadewan imaa Gaanada Akiing Inishkaagewin Ikidowining. Owe gaye daa-debinigaade omaa: [eais.martenfallsaccessroad.ca](http://eais.martenfallsaccessroad.ca).

Endaso-mazina'iganens gaa-wiinjigaadeg omaa da-ikidoomagan owe:

- Nitam ikidowin;
- Gaa-izhiseg noongom;
- Ge-inishkaagemakiban gaye aan ge-onji-gibitinigaadeg;
- Ge-inishkaagemagak; gaye
- Ge-maamawi-inishkaagemagak.

Nin-gii-maamawinaamin ono ozhibii'iganan gaa-gikendaasowaad gaa-gii-ozhibii'amowaad, ji-nisidotamowaad awiyag, daabishkoo aaniindi ezhi-dago-gikenjigaadegin gaye aandi ge-izhi-maamawi-ozhibii'igaadeg iwe gikendaasowin. Owe izhibii'igaadewan ini mazina'iganan:

- Giigooyag gaye gaa-izhi-dazhiikewaad;
- Anaamiindim nibi gaye ogidakamig gaa-ayaag nibi daabishkoo ziibiin gaye zaaga'iganiin;
- Mashkiigoon;
- Azhashki gaye gitigaanan;
- Awensiwag aya'aawishag gaye bineshiinzhag;
- Aya'aawishag daabishkoo adik gaye moonz;
- Gaa-noondaagwak, ishpiming gaa-ayaag gaye gaa-baashkineyaagin ishpiming;
- Gete-iyaa'iiin gaa-gikendamowaad gaye gete-izhitwaawin;
- Gaa-izhi-aanji-izhiwebak;
- Mino-bimaadiziwin ishkoniganing (zhooniyaakewin, mino-ayaawin gaye ji-maanzhisesigwaa awiyag gaye gii-okodaawaad); gaye
- Gaa-naagwak agwajiiing gaye aki gaye gaa-aabajichigaadeg.

## **ES 9. Aaniin Ge-izhi-aanjiseg gidakiminaan Miikana ateg**

Daabishkoo gaa-gii-dazhinjigaadeg aazha, gii-maawadoonigaade gikendaasowin imaa 1 Inake gaye 4 Inake ji-nisidotamang aan ezhiseg noongom aki, zhooniyaakewin gaye izhitwaawin. Iwe gikendaasowin gii-aabajichigaade ji-wiiji'indwaa Marten Falls Anishinaabe ji-odaapinamowaad Endawendamowaad Ji-inamog Miikana. Endaso-gikendaasowining gii-ozhibii'igaade enendamowaad. Gii-ikidom aaniin ge-inishkaagemagakiban (gaa-onizhishing, gaa-maanzhiseg, gaye nisaw) gaye dash ge-izhi-gagwe-gibitnigaadegiban gaa-maanzhichigemagak gaye ji-gagwe-minotoowaad gaye ji-naagadawaabandamowaad ge-inishkaagemagak ishkwaawaach.

Da-dazhinjigaadewag gegoo ge-onji-minoseyang ozhichigaadeg Miikana ES 2. Da-wendad izhaawin aabajitooyan Miikana gaye aanind awiya oga-wiiji'igoonaawaa ji-dazhiikamowaad anishinaabe izhitwaawinan. Da-wanendanziiwag gaa-wanii'igewaad, gaye gaa-andawenjigewaad, gaye bagida'waawaad, da-naazhaginde gegoo.

Da-wenendziwag endawenjigewaad owe onji Miikana, da-minosewan gegoo. Gichi-aya'aag oga-wiiji'aawaa weshkaadizininid ji-andawenjigenid, gaye bagida'waawin, wanii'igewin, ge-ozhitoowaad miijim, mii omaa ji-naagwak ji-gikinoo'amawindwaa bijiinag ge-niigaanishkamowaad gegoo. Nawaj apane babaa-ayaayan noopimiing giga-wiiji'igoowizimin gaye ji-noondamowaad anishinaabemowin. Anishinaabeg ji-gikendamowaad ezhichigaadeg wiisiniwin gaye ji-aazhawinamaadiwaad nawaj ji-gikenindiwaad. Nawaj gegoo wendak oga-dazhiikaanaawaa anishinaabewitwaawinan gaye anishinaabemowin.

Endaso-gikendaasowin aabajichigaade wiindamaagewin gii-ikidowag aan ge-izhiseg maajii-ozhichigaadeg miikana, aabajichigaadeg iwe miikana, gaye ganawenjigaadeg. Iwe gaa-onji-doodamong ji-gikenjigaadeg aaniin ge-inishkaagemagak iwe Dazhiikewin Miikana gaye aki. Gaa-ishkwaa-gikendamowaad ge-inishkaagemagak, ogikendaanaawaa aaniin ge-izhichigeng ji-manaa-izhiseg iwe.

Waasa imaa gaa-izhi-ayaagin zaaga'iganiin gaye ziibiin maagizhaa ziigiseg iwe waasigani-bimide, ji-izhijiwang imaa nibiing. Ishkwaa-waabanjigaadeg iwe daizhichigewag gaawiin gegoon ji-maanzhiseg. Da-dazhinjigaade gakina iwe imaa mazina'iganensing ge-waawiindamaageng.

## **ES 10. Maamaw Ge-izhiseg**

Owe da-izhi-waawiindamaagewag ge-izhisemagakiban

Owe inendan noopimiing e-ayaayeg giin zhigo gidnawemaaganag. Wiinge bangan imaa. Bizaan ayaamagan. Gi-maajii-gitojigem wiinge gizhiwe. Dagoshinowaad nawach gaa-ani-gitaadiziwaad, gewiinawaa owii-bizindaanaawaa gitochigewin gaa-minotamowaad. Giinawaa dash gibizindaam gaa-gizhiweg.

Iwe dash gaa-bizindameg, gigizhewetoom aaniish. Wiinge biinish gichi-initaagwan gakina e-baatiinoweg. Wiinge gichi-initaagwan gaa-biidoyeg imaa noopimiing, mii iwe gaa-idamaang Maamaw Ge-izhiseg.

Nisinoon omaa gaa-dazhinjigaadeg ji-nisidotqamang. Onoweniwan gaa-idamaang:

- **Niizhingin Gaa-izhiseg:** giishpin bezhig gegoon izhiseg gii-izhiseg gegoon, mii iwe. Daabishkoo gii-biidooyeg gitochigewin imaa noopiming, niswayag ayaamagan gaa-onjiimagak gaa-noondaagwag bezhigwan apii. Giishpin dash awiya gitochiged ishkwaamaajaayeg, ini niizhin izhichigewinan gaawiin naasaab izhisesinoon. Iwe gaa-gii-noondaagomochigeyeg gaawiin naasaab izhisesinoon noongom gaa-noondaagwak.
- **Aandi gaa-izhiseg:** Bezahig gegoon inakamigak ngoji bakaan. Giishpin awiyag bakaan dazhi-gitochigewaad, gaawiin dash noondaagozisiiwag gaa-izhi-ayaayeg, gaawiin da-noondaagozisiiwag. Gaawiin naasaab izhisesinoon iwe.
- **Ge-waabanjigaadegiban Izhichigewin:** Owe ishkwaawaach gaa-dazhinjigaadeg gegoonan ge-izhisegibaniin ge-gikendaman ge-inishkaagemagakin. Daabishkoo giishpin noopimiing ayaayeg, awiyag dash biizhaawaad ji-moojigitoowaad, mii iwe Maamaw Inishkaagewin gaa-izhinikaadeg. Gaawiin aaniish gi-gii-gikendaziim ji-biizhaawaad ji-ombiigiziwaad. Mii dash gaa-ijigaadeg giishpin ozhichigaadeg miikana, gaye dash biigoseg aazhogan, amii dash ji-wawezhichigaadeg. Gaawiin gii-gikenjigaadesinoon ji-izhiseg. Gaawiin gi-gii-gikendaziin iwe ji-izhiseg, ji-gichi-initaagwak wawezhichigaadeg iwe aazhogan.

Owe dash ji-nisidotaman ezhiseg gii-ombiigizinaaniawng noopimiing, owe gidaa:

- Nisidotan **aaniin gaa-izhiseg jibwaa-dagoshinan imaa**, aaniin gaa-initaagwak.
- Nisidotan aan **enishkaagemagak** gii-ombiigiziyin imaa gaa-initaagwak noopimiing.;
- Naanaagadawendan **ge-izhichigeyamban ji-manaa-maanzhichigesiwani** gii-ombiigiziyin.nawach ji-gizhiwesinog gaa-bizindaman gi-daa-izhichige;

- Naanaagadawendan **aaniin giyaabi** ge-izhiseg ishkwaagagwe-gwayakotooyin gii-ombiigiziyin.
- Godak **gegoonan gaa-ayaagin imaa gaa-ombiigiziimagakin ayaamaganoon.** Giin gi-doombiigiz, gegoonan dash bakaan ombiigiziimaganoon.

Gaa-ishkwaa-agindaman gaa-dazhinjigaadeg omaa, gigikendaamin aan enitaagwak gii-maamawi'idiying noopimiing gemaa bakaan inakamigak imaa noopimiing gaawiin giinawind eta.

Daabishkoo gaa-naagwak omaa, ozhibii'igaade ewe gii-maamawiseg iwe ombiigiziwin..

## **ES 11. Gi-gii-bizindaamin**

Marten Falls Anishinaabeg ogaganooonaaawaa godak anishinaabe' gaa-ayaanid bakaan ishkonganing, gaye awiyag gaa-wii-bizindamowaad gaye ogimaawinan apii 2019 gii-izhiseg. Gii-inaawag iwe ji-doodamowaad iwe Enishkaagemagak / Inishkaagewin Ikidowin, Marten Falls Anishinaabeg gii-inaawag ji-gaganooonaaawaa awiya bakaan, daabishkoo gaa-okwiinowaad Anishinaabeg gaye godak gaa-okwiinowaad gaye imaa/akiikaaning gaa-anokiiwaad.

Gii-maajiseg iwe Enishkaagemagak / Inishkaagewin Ikidowin, niibiwa onizhishin gaa-izhiseg. Gakina igi gaa-dazhimindwaa omaa gii-gaganoonindiawag ji-dazhindamowaad gakina owe gaa-waawiinjigaadeg omaa mazina'iganing ji-gikendamowaad aan ezhi-gikendaagwak noongom gaa-izhiseg, gaye ezhi-andawenjigaadeg aandi Ge-inamog iwe Miikana gaye e-gii-ozhichigaadeg iwe Anishinaabe inakonigewin ji-wiindeg aaniindi Ge-inamok iwe Miikana August 2024 gii-izhiseg.

- Mii o'owe gaa-inaagwak nitam gii-naanaagadawaabanjigaadeg inakonige mazina'igan omaa Inamoog Miikana;
- Da-ozhichigaade Anishinaabe Inakonige Mazina'igan omaa Marten Falls First Nation inake Ge-inamoog Miikana owe apii Manoominikewigiizis 2024;
- Akawe izhinizha'amawaawag enokaadamowaad miikana oga-bi-azhe-nizhanaawaa nakwetamowin niwin mazina'igan da-izhinizha'igaadewan izhinigo-biboon #1, 2, 3, gaye 4;
- Akawe izhinizha'amawaawag enokaadamowaad miikana oga-bi-azhe-nizhanaawaa nakwetamowin (giin igo) owe nitam Draft Environmental Assessment / Impact Statement,
- Da-ozhichigaade Anishinaabe Inakonige Mazina'igan omaa Marten Falls First Nation miinawaa bezhig oga-ozhitoonaawaa mii owe ishkwaaj Final

Environmental Assessment / Impact Statement owe apii Makoonsiwigiizis 2026; gaye

- Da-izhinizha'amawaa zhaaganaashii ogimaa Eshkwesing Mazina'igan Final Environmental Assessment / Impact Statement owe apii Makoonsiwigiizis 2026 wiinawaa ji-waabandamowaad.

Gaa-miikanaagewaad ogagwe-nagadenimaawaa' Anishinaabeg weweni ji-anokiindiwaad. Aazha, wiin igo odoodaanaamiwaang weweni nisidotaadiwag, ayaapiichinaag dibaakonigewag / dazhindamowaad gegoo ge-izhi-minosegin. Aanind gaye igiwedi Anishinaabeg gii-andomaawag gii-dibaakonigewaad Marten Falls First Nation (nashke ogowe, Eabametoong First Nation gaye Aroland First Nation) oga-dazhindaanaawaa weweni gegoo ge-izhi-wiiji'idiwaad, da-wiindamawaawaad gaye epiichiichigaadeg Miikana.

Martin Falls First Nation Anishinaabeg onandawendaanaawaa ji-ozhichigaadeg Miikana gabeya'ii naanaagadawaabandaanaawaa gaye ogii-naanaagadawendaanaawaa gaye wa'awe zhaaganaashii ogimaa ogowe gaye anishinaabe gaa-misawendamowaad. Gakina owe mazina'iganan Marten Falls First Nation gaa-gii-ozhichigaadegin gaa-gii-ikidowaad anishinaabeg mii omaa gii-inaagwak akawe gii-kakwejimindwaa Anishinaabeg. Nitam akawe gii-kagwejimaawag niibiwa gegoo ogii-onji-gikendaanaawaan ge-ozhitoowaad i'i Miikana, waa-izhichigaadeg miikana Environmental Assessment / Impact Assessment, ogii-waabandaanaawaa onowe Anishinaabe Izhitwaawinan gaye imaa inamoog miikana.

Baateya'iinag akawe ogii-kaganoonag owe anishinaabe zhaaganaashii ogimaa ishkwaj mazina'igan Final Environmental Assessment / Impact Statement. Miiwan onowe gaa-izhisegin (aanind gegoo gaawiin da-wiindesinoon):

- Five Public Information Centres Izhinikaadewag (mii o'apii gaa-maazhi-izhichigaadeg Mazina'igan Environmental Assessment owe apii Binaakwiiwigiizis 2021);
- Niiwining gii-tibaakonigewag, niizh Aboriginal gemaa / gaye Treaty Rights gaye Interests Forums gaye niizh Three-Road Project Gathering gaye Expo, Miikanan ogowe, Webequie Supply Road gaye Northern Road Link Anishinaabeg;
- 50 geyaabi giga-dibaakonigemin maagizhaa imaa / gaye aazhawaatebii'iganing, da-dagwenimaa gaye zhaaganashii ogimaa gaye aanind awiyag endawendamowaad;
- Oga-izhitoonaawaa Ezhi-anishinaabewichigeng, onjida ji-gagwekendamowaad ezhichigewaad anishinaabeg ogowe wemitigoozhiwag Community Co-ordinator

Program, gaye Community Capacity Funding Program for Indigenous communities ishkongiganan;

- Da-miinaawag Progress Reports ji-naagwatoowaad aaniin minik gaa-inanokaadamowaad omaa Ishkongiganikaang;
- Aazhawaatebii'iganing da-naagwad, ge-meshkonaagwak gidakiiminaang, da-naagwad waa-inamoog miikana gaye ayaapiichinaag da-naagwad, Nitam Gaa-tibaajimomagak Mazina'igan Draft Environmental Assessment / Impact Statement; gaye
- Endaso-giizis da-izhinizha'igaade aazhawaatebii'iganing E-Blasts (mazina'iganan), apii aazha minik enokaadeg miikana, da-gagwejimaawag anishinaabeg gegooyan ge-wii-maashkigaadegin Indigenous Community Leads.

Gakina gegoo gaa-gii-dazhinjigaadegin da-ozhibii'igaadewan Ishkwaaj Gaa-gii-ozhichigaadeg Mazina'igan Final Environmental Assessment / Impact Statement. Gakina gegoo gaa-gii-dazhinjigaadegin omaa mazina'iganing da-ozhibii'igaadewan [omaa RoCE gaye the Cumulative Effects Consultation Report Mazina'igan].

## **ES 12. Gaa-ani-aanjiseg Gaa-izhiwebak Agwajiing**

Gii-aanjiseg gaa-izhiwebak zanagisemagan gegoon daabishkoo ishkongiganing Marten Falls. Daabishkoo ono nawach gii-gichi-gimiwang, gii-mooshka'ang, gii-zakideg, gii-gichi-gizhideg gaye gaa-aanjiseg gakina gegoon omaa, maagizhaa da-onji-maanzhise ozhichigaadeg iwe Dazhiikewin Miikana gaye ji-naagajichigaadeg. Giinawind ge-apenimoying iwe miikana.

Iwe Dazhiikewin Miikana gaa-anokaadamowaad izhichigewag ji-manaa-onjiseg gegoon gaa-onizhishinziinog ozhichigaadeg iwe miikana gaye naagajichigaadeg. Da-izhichigaade ji-manaa-maanzhiseg giishpin gichi-izhiwebak agwajiing. Wii-ozhitoonaawaa miikana ge-zoongak gaye ji-minosewaad awiyag aanawi aanji-izhiwebak. Da-minose iwe Dazhiikewin Miikana gaawin dash giyaabi daa-gibitinigaadesinoon gaa-zanagak..

## **ES 13. Godak Ge-izhichigenaaniwangiban**

Mii ezhi-andawendang Gaanada Aki ogimaa ji-naagadawaabandamowaad wegonen ge-maanzhisegiban imaa Dazhiikewin Miikanaang. Ge-izhichigaadeg iwe miikana. Gaye enaagadawenjigaadeg aaniin gaa-gii-izhisegin godag izhichiganan gii-gikenjigaade aaniin ge-izhi-maanzhisegiban daabishkoo giishpin ziigiseg waasigani-bimide, bichishinowin, gaye ozaami-gichi-maanzhi-izhiwebak, gaye godag.

Gaawin awiya daa-bichishinzii giishpin weweni niigaan inaabing ge-izhiseg gegoon, gaye izhichigaadeg iwe miikana. Gaye daa-ozhiitaawag imaa gaa-anokiiwaad ji-izhitoowaad odanokiiwiniwaa gegoon ji-izhi-bichishinzig awiya anokiid, gaye ji-gikendamowaad ge-izhichigewaad giishpin awiya bichishing. Da-izhichigewag awenen ge-inanokii'ind ji-dazhiikang iwe miikana, ji-gikendang aaniin ge-doodang giishpin gegoon izhiseg. Daabishkoo, godag inake ji-izhitoowaad iwe ozhichigan, aandi gaye ge-izhi-webinigewaad, gaye aaniin ge-izhichigewaad gichi-gegoon izhiseg gaye aaniin ge-izhi-naagaji'indwaa aya'aawishag.

Iwe Dazhiikewin Miikana da-izhichigaade gaa-izhi-andawendang Ontario Ogimaa Miikanawan Gaa-Naagajitood. Gaye dash, mazinibii'igan gaa-biminizha'igaadeg ji-ozhichigaadeg iwe Dazhiikewin Miikana mii iwe gaa-doodamowaad Bimi-ayaawin Gaanada Akiing gaye Ogimaa Gaa-naagajitood Bimishkaawin Ontario omaa nake.

Giishpin ayaasinog ge-biminizha'igaadeg ji-wiiji'indwaa Anishinaabe dazhiikewinan gaye wemitigoozhiwag gaa-anokiiwaad gii-wiijiwidiwaad, maagizhaa daa-bichishin awiya gaye gaawin Anishinaabewaadziniw iwe. Da-gikinoo'amawag imaa anishinaabeg gegoo ge-maazhichigemagakiban bagamamoog miikana. Da-wiiji'aawag anishinaabeg weweni nisidotaadiyang, ji-ganawendaming Anishinaabe izhitwaawinan.

Gaanada Aki gaa-doodang iwe Inishkaagewin Wiindamaagewinan andawendamooj ji-wiindamawindwaa aaniin ge-izhi-wiiji'iwemagak iwe Dazhiikewin Miikana ji-wiinichigaadesinog aki gaye ji-minodoodamowaad. Megwaa odaapinamowaad aandi ge-bimi-inamog miikana iwe Izhichigewin Gaa-dazhiikamowaad gii-ikidowag inishkaagewin ji-ganawaabanjigaadeg apii maawadoonamowaad gikendaasowin igi gaa-nagajitoowaad ji-waabandamowaad aaniin nibi, aki gaye awiyag ge-inishkaagemagak iwe ozhichigewin. Owe gikendaasowin da-ikidoomagan Gaa-andawenjigaadeg Aandi Ge-inamog ji-ikidowaad ini nisin izhichigewinan maawach gebekang izhichigewin apiich godak izhichigewinan. Inishkaagewin mawach da-bizinjigaade, apii onwaadamowaad aandi Ge-inamog miikana gaye ji-ozhitoowaad wegonen ge-minosemagak.

## **ES 14. Gaa-naagajichigemagakin Izhichigewinan gaye Niigaan**

Naagadawaabanjigaadegin izhichigewinan da-onizhishin ji-gikenjigaadeg giishpin debwe e-izhiseg gegoon gaa-izhi-gikendamowaad gaye giishpin ji-manamaanzhidoodamowaad. Naagadawaabanjigaadegin ono gaye niigaan da-izhichigaaniwan ji-manamaanzhichigeng. Da-ozhichigaade ji-naagajichigaadeg owe izhichigewin gaye da-wiiji'aawag igi gaa-gichi-inenjigaadeg gaa-gii-wiindegin imaa Enishkaagemagak / Inishkaagewin Ikidowining.

Iwe Enishkaagemagak / Inishkaagewin Ikidowin izhichigemagan oganawaabandaanaawaa ge-doodamowaad jibwaa-ozhichigewaad gaye ozhichigewaad, gaye aabadak miikana gaye ganawenjigaadeg gaye niigaan ge-doodamowaad igi gaa-nagajitoowaad gegoon.

## **ES 15. Gaa-dakoosing Ikidowin gaye Ge-izhichigenaaniwangiban**

Owe Miikana da-sakamon owe Marten Falls First Nation Miikana gichi-miikanaang, dawendad mawandisidiwin. Gaye da-naazhigindewan gegooyan wiisiniwin, waasiganibiimide, gaye noojimomashkikiwan, miinawaa gikinoo'amaadiwin gaye mino-ayaayang. Miikana giga-wiiji'igoomin ge-onji-mino-ayaayang.

Anokiiwinan da-onjiwan, omaa Ishkoniganikaang miziwe Miikanaang. Anishinaabeg da-anokii'aawag bashkwada'igaadeg Miikana.

Maagizhaa gaawiin gakina gegoo da-onji-minosesinoon inamoog Miikana, da-minose gegooyan. Gakina gegoo da-minosewan misawendaagwad ge-izhi-mino-ayaayangoban. Gii-ikido Ogimaakaan Bruce, "Gaawiinoon eta go owe miikana; ji-naagwatooyang gimashkawendamowinaanin, ji-naagwatooyang aaniin ezhi-andawendamang gaye mii owe wiiji' mino-bimaadiziwin omaa ishkoniganing." Marten Falls First Nation inendamooj ji-ozhichigaadeg Miikana.

Marten Falls First Nation oga-dazhindaanaawaa wegonen geyaabi ge-izhichigeyang ge-onji-mino-ayaayang Assessment Process.